

史記卷八十四

屈原賈生列傳第二十四

屈原者，名平，楚之同姓也。〔一〕爲楚懷王左徒。〔二〕博聞彊志，明於治亂，嫻〔三〕於辭令。入則與王圖議國事，以出號令；出則接遇賓客，應對諸侯。王甚任之。

〔一〕正義屈、景、昭皆楚之族。王逸云：「楚王始都是，生子瑕，受屈爲卿，因以爲氏。」

〔二〕正義蓋今（在）左右拾遺之類。

〔三〕集解史記音隱曰：「音閑」。

上官大夫與之同列，爭寵而心害其能。懷王使屈原造爲憲令，屈平屬草稟〔一〕未定。上官大夫見而欲奪之，〔二〕屈平不與，因讒之曰：「王使屈平爲令，衆莫不知，每一令出，平伐其功，（曰）以爲『非我莫能爲』也。」王怒而疏屈平。

〔一〕索隱屬音燭。草稟謂創制憲令之本也。漢書作「草具」，崔浩謂發始造端也。

〔二〕正義王逸云上官靳尚。

屈平疾王聽之不聰也，讒諂之蔽明也，邪曲之害公也，方正之不容也，故憂愁幽思而作離騷。〔一〕離騷者，猶離憂也。夫天者，人之始也；父母者，人之本也。人窮則反本，故勞苦倦極，未嘗不呼天也；疾痛慘怛，〔二〕未嘗不呼父母也。屈平正道直行，〔三〕竭忠盡智以事其君，讒人閒之，可謂窮矣。信而見疑，忠而被謗，能無怨乎？屈平之作離騷，蓋自怨生也。國風好色而不淫，小雅怨誹而不亂。〔四〕若離騷者，可謂兼之矣。上稱帝嚳，下道齊桓，中述湯武，以刺世事。明道德之廣崇，治亂之條貫，靡不畢見。其文約，其辭微，其志潔，其行廉，其稱文小而其指極大，舉類邇而見義遠。其志潔，故其稱物芳。其行廉，故死而不容自疏。濯淖〔五〕汙泥〔六〕之中，蟬蛻於濁穢，〔七〕以浮游塵埃之外，不獲世之滋垢，皜然〔八〕泥而不滓者也。〔九〕推此志也，雖與日月爭光可也。〔一〇〕

〔一〕索隱 悞，亦作「騷」。按：楚詞「悞」作「騷」，音素刀反。應劭云「離，遭也；騷，憂也」。又離騷序云「離，別也；騷，愁也」。

〔二〕正義 上七感反，下丁達反。慘，毒也。怛，痛也。

〔三〕正義 寒孟反。

〔四〕正義 誹，方畏反。

〔五〕索隱 上音濁，下音鬧。

〔六〕索隱 上音烏故反，下音奴計反。

〔七〕正義 蛻音稅，去皮也，又他臥反。

〔八〕集解 徐廣曰：「嚼，疏淨之貌。」索隱 嚼音自若反。徐廣云「疏淨之貌」。

〔九〕索隱 泥亦音涅，滓亦音淄，又並如字。

〔一〇〕正義 言屈平之仕濁世，去其汙垢，在塵埃之外。推此志意，雖與日月爭其光明，斯亦可矣。

屈平既紉，其後秦欲伐齊，齊與楚從親，〔一〕惠王患之，乃令張儀詳去秦，厚幣委質事楚，曰：「秦甚憎齊，齊與楚從親，楚誠能絕齊，秦願獻商於之地六百里。」楚懷王貪而信張儀，遂絕齊，使使如秦受地。張儀詐之曰：「儀與王約六里，不聞六百里。」楚使怒去，歸告懷王。懷王怒，大興師伐秦。秦發兵擊之，大破楚師於丹、淝，〔二〕斬首八萬，虜楚將屈匄，〔三〕遂取楚之漢中地。〔四〕懷王乃悉發國中兵以深入擊秦，戰於藍田。魏聞之，襲楚至鄧。〔五〕楚兵懼，自秦歸。而齊竟怒不救楚，楚大困。

〔一〕正義 上足松反。

〔二〕索隱 二水名。謂於丹水之北，淝水之南。丹水、淝水皆縣名，在弘農，所謂丹陽、淝城。

城。

〔三〕索隱 屈，姓。匄，名，音蓋也。

〔四〕索隱 徐廣曰：「楚懷王十六年，張儀來相；十七年，秦敗屈匄。」正義 梁州。

〔五〕索隱按：此郢在漢水之北，故郢侯城也。

明年，秦割漢中地與楚以和。楚王曰：「不願得地，願得張儀而甘心焉。」張儀聞，乃曰：「以一儀而當漢中地，臣請往如楚。」如楚，又因厚幣用事者臣靳尚，而設詭辯於懷王之寵姬鄭袖。懷王竟聽鄭袖，復釋去張儀。是時屈平既疏，不復在位，使於齊，顧反，諫懷王曰：「何不殺張儀？」懷王悔，追張儀不及。〔二〕

〔二〕索隱按：張儀傳無此語也。

其後諸侯共擊楚，大破之，殺其將唐昧。〔二〕

〔二〕集解徐廣曰：「二十八年敗唐昧也。」正義昧，莫葛反。

時秦昭王與楚婚，欲與懷王會。懷王欲行，屈平曰：「秦虎狼之國，不可信，不如毋行。」〔二〕懷王稚子子蘭勸王行：「柰何絕秦歡！」懷王卒行。入武關，秦伏兵絕其後，因留懷王，〔三〕以求割地。懷王怒，不聽。亡走趙，趙不內。復之秦，竟死於秦而歸葬。

〔二〕索隱按：楚世家昭睢有此言，蓋二人同諫王，故彼此各隨錄之也。

〔三〕集解徐廣曰：「三十年入秦。」

長子頃襄王立，〔二〕以其弟子蘭爲令尹。楚人既咎子蘭以勸懷王入秦而不反也。

〔二〕索隱名橫。

屈平既嫉之，雖放流，睠顧楚國，繫心懷王，不忘欲反，冀幸君之一悟，俗之一改也。其存君興國而欲反覆之，一篇之中三致志焉。然終無可柰何，故不可以反，卒以此見懷王之終不悟也。人君無愚智賢不肖，〔一〕莫不欲求忠以自爲，舉賢以自佐，然亡國破家相隨屬，而聖君治國累世而不見者，其所謂忠者不忠，而所謂賢者不賢也。懷王以不知忠臣之分，故內惑於鄭袖，外欺於張儀，疏屈平而信上官大夫，令尹子蘭。兵挫地削，亡其六郡，身客死於秦，爲天下笑。此不知人之禍也。易曰：「井泄不食，〔三〕爲我心恻，〔三〕可以汲。〔四〕王明，並受其福。」〔五〕王之不明，豈足福哉！〔六〕

〔一〕索隱 此已下太史公傷懷王之不任賢，信讒而不能反國之論也。

〔三〕集解 向秀曰：「泄者，浚治去泥濁也。」 索隱 向秀字子期，晉人，注易。

〔三〕集解 張璠曰：「可爲惻然，傷道未行也。」 索隱 張璠亦晉人，注易也。

〔四〕索隱 按：京房易章句言「我道可汲而用也」。

〔五〕集解 易象曰：「求王明受福也。」 索隱 按：京房章句曰「上有明王，汲我道而用之，天下並受其福，故曰『王明並受其福』也。」

〔六〕集解 徐廣曰：「一云『不足福』。」 正義 言楚王不明忠臣，豈足受福，故屈原懷沙自沈。

令尹子蘭聞之大怒，卒使上官大夫短屈原於頃襄王，頃襄王怒而遷之。〔二〕

〔二〕集解 離騷序曰：「遷於江南。」

屈原至於江濱，被髮行吟澤畔。顏色憔悴，形容枯槁。漁父〔二〕見而問之曰：「子非三閭大夫歟？」〔三〕何故而至此？」屈原曰：「舉世混濁而我獨清，衆人皆醉而我獨醒，是以見放。」漁父曰：「夫聖人者，不凝滯於物而能與世推移。舉世混濁，何不隨其流〔三〕而揚其波？衆人皆醉，何不鋪其糟而啜其醑？何故懷瑾握瑜〔四〕而自令見放爲？」屈原曰：「吾聞之，新沐者必彈冠，新浴者必振衣，人又誰能以身之察察，〔五〕受物之汶汶者乎！〔六〕寧赴常流〔七〕而葬乎江魚腹中耳，又安能以皓皓之白而蒙世俗之溫蠖乎！」〔八〕

〔二〕索隱 音甫。

〔三〕集解 離騷序曰：「三閭之職，掌王族三姓，曰昭、屈、景，序其譜屬，率其賢良，以厲國士。」

〔三〕索隱 按：楚詞作「滑其泥」。

〔四〕索隱 按：楚詞此「懷瑾握瑜」作「深思高舉」也。

〔五〕集解 王逸曰：「已靜潔。」

〔六〕集解 王逸曰：「蒙垢汚。」 索隱 汶汶者，音閔。汶汶猶昏暗也。

〔七〕索隱 常流猶長流也。

〔八〕索隱 蠖音烏廓反。溫蠖猶昏憤。楚詞作「蒙世之塵埃哉」。

乃作懷沙之賦。〔二〕其辭曰：

〔二〕**索隱**按：楚詞九懷曰「懷沙礫以自沈」，此其義也。

陶陶孟夏兮，草木莽莽。〔二〕傷懷永哀兮，汨徂南土。〔三〕眴兮窈窈，〔三〕孔靜幽

墨。〔四〕冤結紆軫兮，離愍之長鞠；〔五〕撫情効志兮，俛詘以自抑。

〔二〕**集解**王逸曰：「陶陶，盛陽貌。莽莽，盛茂貌。」**索隱**音姥。**正義**莫古反。

〔三〕**集解**王逸曰：「汨，行貌。」**索隱**王師叔曰：「汨，行貌也。」方言曰：「謂疾行也。」

〔三〕**集解**徐廣曰：「眴，眩也。」**索隱**眴音舜。徐氏云：「眴音眩。窈音烏鳥反。」

〔四〕**集解**王逸曰：「孔，甚也。墨，無聲也。」**正義**孔，甚。墨，無聲。言江南山高澤深，視之眴；野甚清淨，歎無

人聲。

〔五〕**集解**王逸曰：「鞠，窮。紆，屈也。軫，痛也。愍，病也。」**索隱**離滑。滑，病。鞠，窮。

刊方以爲圓兮，常度未替；〔二〕易初本由兮，君子所鄙。〔三〕章畫職墨兮，前度未

改；〔三〕內直質重兮，大人所盛。〔四〕巧匠不斲兮，孰察其揆正？玄文幽處兮，矇謂之

不章；〔五〕離婁微睇兮，瞽以爲無明。〔六〕變白而爲黑兮，倒上以爲下。〔七〕鳳皇在笱

兮，〔八〕雞雉翔舞。〔九〕同糅玉石兮，一槩而相量。〔二〇〕夫黨人之鄙妒兮，羌不知吾所

臧。〔二一〕

〔二〕**集解**王逸曰：「刊，削；度，法；替，廢也。言人刊削方木，欲以爲圓，其常法度尙未廢也。」**索隱**刊音五官

反。謂刻削方木以爲圓，其常法度尙未廢。

〔三〕**集解**王逸曰：「由，道也。」**正義**本，常也。鄙，恥也。言人遭世不道，變易初行，遠離光道，君子所鄙。

〔三〕**集解**王逸曰：「章，明也。度，法也。言工明於所畫，念其繩墨，修前人之法，不易其道，則曲木直而惡木好。」

索隱章，明也。畫，計畫也。楚詞「職」作「志」。志，念也。餘如注所解。

〔四〕**集解**王逸曰：「言人質性敦厚，心志正直，行無過失，則大人君子所盛美也。」

〔五〕**集解**王逸曰：「玄，黑也。矇，盲者也。詩云『矇矓奏公』。章，明也。」

〔六〕**集解**王逸曰：「離婁，古明視者也。瞽，盲也。」**正義**睇，田帝反，眇也。

〔七〕**索隱**音戶。

〔八〕**集解**徐廣曰：「笄，一作『郊』。」**駟案**：王逸曰「笄，籠落也」。 **索隱**笄音奴，又女加反。徐云一作「郊」。按：

籠落謂藤蘿之相籠絡。 **正義**應瑞圖云：「黃帝問天老曰：『鳳鳥何如？』天老曰：『鴻前而麟後，蛇頸而魚尾，

龍文而龜身，燕鵠而鷄喙，首戴德，頸揭義，背負仁，心入信，翼俟順，足履正，尾繫武，小音金，大音鼓，延頸奮翼，

五色備舉。』」。

〔九〕**索隱**楚詞「雉」作「鷺」。

〔一〇〕**集解**王逸曰：「忠佞不異。」

〔一一〕**集解**王逸曰：「莫昭我之善意。」 **索隱**按：王師叔云「羌，楚人語辭」。言卿何為也。 **正義**羌音疆。

任重載盛兮，陷滯而不濟；
〔二〕懷瑾握瑜兮，窮不得余所示。
〔三〕邑犬羣吠兮，吠所怪也；
誹駿疑桀兮，固庸態也。
〔四〕文質疏內兮，衆不知吾之異采；
〔五〕材樸委積兮，莫知余之所有。
重仁襲義兮，謹厚以為豐；
〔六〕重華不可悟兮，孰知余之從容！古

固有不並兮，豈知其故也？〔七〕湯禹久遠兮，邈不可慕也。懲違改忿兮，抑心而自
彊；離潛而不遷兮，願志之有象。〔八〕進路北次兮，〔九〕日昧昧其將暮；含憂虞哀兮，〔一〇〕
限之以大故。〔一一〕

〔一〕集解 王逸曰：「言己才力盛壯，可任用重載，而身陷沒沈滯，不得成其本志也。」

〔二〕集解 王逸曰：「示，語也。」

〔三〕集解 王逸曰：「千人才爲俊，一國高爲桀也。庸，所賤之人也。」〔索隱〕按：尹文子云「千人曰俊，萬人曰桀」。

今乃誹俊疑傑，固是庸人之態也。

〔四〕集解 徐廣曰：「異，一作『奧』。」駟案：王逸曰「采，文采也」。

〔五〕集解 王逸曰：「重，累也。襲，及也。」

〔六〕集解 王逸曰：「悟，逢也。」〔索隱〕楚詞「悟」作「遷」，並吳故反。王師叔云「悟，逢也」。

〔七〕索隱 楚詞作「莫知其何故」。

〔八〕集解 王逸曰：「象，法也。」

〔九〕正義 北次將就。

〔一〇〕索隱 楚詞作「舒憂娛哀」。娛音虞。娛者，樂也。

〔一一〕集解 王逸曰：「娛，樂也。大故謂死亡也。」

亂曰：〔一二〕浩浩沅、湘兮，〔一三〕分流汨兮。〔一四〕脩路幽拂兮，〔一五〕道遠忽兮。曾唵恆悲

兮，永歎慨兮。世既莫吾知兮，人心不可謂兮。〔五〕懷情抱質兮，獨無匹兮。伯樂既歿兮，驥將焉程兮？〔六〕人生稟命兮，各有所錯兮。〔七〕定心廣志，餘何畏懼兮？〔八〕曾傷爰哀，永歎喟兮。〔九〕世溷不吾知，心不可謂兮。知死不可讓兮，願勿愛兮。明以告君子兮，吾將以為類兮。〔一〇〕

〔一〕**索隱**王師叔曰：「亂者，理也。所以發理辭指，撮總其要，而重理前意也。」

〔二〕**索隱**二水名。按：地理志湘水出零陵陽海山，北入江。沅即湘之後流也。**正義**說文云：「沅水出牂柯，東

北流入江。湘水出零陵縣陽海山，北入江。」按：二水皆經岳州而入大江也。

〔三〕**集解**王逸曰：「汨，流也。」

〔四〕**索隱**楚詞作「幽蔽」也。

〔五〕**集解**王逸曰：「謂猶說也。」**索隱**楚詞無「曾嗟」已下二十一字。

〔六〕**集解**王逸曰：「程，量也。」

〔七〕**集解**王逸曰：「錯，安也。」

〔八〕**索隱**楚詞「餘」並作「余」。

〔九〕**集解**王逸曰：「喟，息也。」

〔一〇〕**集解**王逸曰：「類，法也。」**正義**按：類，例也。以為忠臣不事亂君之例。

於是懷石遂自投沈汨羅以死。〔一一〕

〔二〕**集解**應劭曰：「汨水在羅，故曰汨羅也。」

索隱汨水在羅，故曰汨羅。

地理志長沙有羅縣，羅子之所徙。

荆

州記「羅縣北帶汨水」。汨音覓也。

正義故羅縣城在岳州湘陰縣東北六十里。春秋時羅子國，秦置長沙郡

而爲縣也。按：縣北有汨水及屈原廟。

續齊諧記云：「屈原以五月五日投汨羅而死，楚人哀之，每於此日以竹筒

貯米投水祭之。

漢建武中，長沙區回白日忽見一人，自稱三閭大夫。謂回曰：「聞君常見祭，甚善。但常年所遺，

並爲蛟龍所竊，今若有惠，可以練樹葉塞上，以五色絲轉縛之，此物蛟龍所憚。」

回依其言。世人五月五日作糉，

并帶五色絲及練葉，皆汨羅之遺風。」

屈原既死之後，楚有宋玉、唐勒、景差〔二〕之徒者，皆好辭而以賦見稱；然皆祖屈原之從容辭令，終莫敢直諫。其後楚日以削，數十年竟爲秦所滅。

〔二〕**集解**徐廣曰：「或作『慶』。」

索隱按：

楊子法言及漢書古今人表皆作「景差」，今作「差」是字省耳。又按：

徐、裴、鄒三家皆無音，是讀如字也。

自屈原沈汨羅後百有餘年，漢有賈生，爲長沙王太傅，過湘水，投書以弔屈原。

賈生名誼，〔二〕雒陽人也。年十八，以能誦詩屬書聞於郡中。

吳廷尉爲河南守，聞其秀

才，〔三〕召置門下，甚幸愛。

孝文皇帝初立，聞河南守吳公〔三〕治平爲天下第一，故與李斯同

邑而常學事焉，乃徵爲廷尉。廷尉乃言賈生年少，頗通諸子百家之書。文帝召以爲博士。

〔一〕**索隱** 名義。漢書並作「誼」也。

〔二〕**正義** 顏云：「秀，美也。」應劭云：「避光武諱改『茂才』也。」

〔三〕**索隱** 按：吳，姓也。史失名，故稱公。

是時賈生年二十餘，最爲少。每詔令議下，諸老先生不能言，賈生盡爲之對，人人各如其意所欲出。諸生於是乃以爲能，不及也。孝文帝說之，超遷，一歲中至太中大夫。

賈生以爲漢興至孝文二十餘年，天下和洽，而固當改正朔，易服色，法制度，定官名，興禮樂，乃悉草具其事儀法，色尙黃，數用五，〔一〕爲官名，悉更秦之法。孝文帝初卽位，謙讓未遑也。諸律令所更定，及列侯悉就國，其說皆自賈生發之。於是天子議以爲賈生任公卿之位。絳、灌、東陽侯、馮敬之屬盡害之，〔二〕乃短賈生曰：「雒陽之人，年少初學，專欲擅權，紛亂諸事。」於是天子後亦疏之，不用其議，乃以賈生爲長沙王太傅。

〔一〕**正義** 漢文帝時黃龍見成紀，故改爲土也。

〔二〕**正義** 絳、灌，周勃、灌嬰也。東陽侯，張相如。馮敬時爲御史大夫。

賈生既辭往行，聞長沙卑溼，自以壽不得長，又以適去，〔一〕意不自得。及渡湘水，爲賦以弔屈原。其辭曰：

〔二〕**集解**徐廣曰：「適，竹革反。」韋昭曰：「謫，譴也。」**索隱**韋昭云：「適，譴也。」字林云：「丈戾反。」

共承嘉惠兮，〔二〕俟罪長沙。側聞屈原兮，自沈汨羅。造託〔三〕湘流兮，敬弔先生。

遭世罔極兮，乃隕厥身。嗚呼哀哉，逢時不祥！鸞鳳伏竄兮，〔三〕鴟梟翱翔。闖茸尊顯

兮，〔四〕讒諛得志；賢聖逆曳兮，方正倒植。〔五〕世謂伯夷貪兮，謂盜跖廉；〔六〕莫邪爲

頓兮，〔七〕鉛刀爲銛。〔八〕于嗟嚶嚶兮，生之無故！〔九〕幹奔周鼎兮寶康瓠，〔二〇〕騰駕罷牛

兮驂蹇驢，〔二一〕驥垂兩耳兮服鹽車。〔二二〕章甫薦屨兮，〔二三〕漸不可久；〔二四〕嗟苦先生兮，獨

離此咎！〔二五〕

〔二〕**集解**張晏曰：「恭，敬也。」

〔三〕**索隱**造音七到反。

〔四〕**索隱**竄音如字，又七外反。

〔五〕**索隱**闖音天臘反。茸音而隴反。案：應劭、胡廣云「闖茸不才之人，無六翮翱翔之用而反尊貴」。字林曰「闖茸，不肖之人」。

〔六〕**索隱**胡廣云：「逆曳，不得順隨道而行也。倒植，賢不肖顛倒易位也。」

〔七〕**索隱**案：漢書作「隨、夷溷兮跖、蹻廉」，一句皆兼兩人。隨，卞隨也。夷，伯夷也。跖，盜跖也。蹻，莊蹻也。

〔八〕**集解**應劭曰：「莫邪，吳大夫也，作寶劍，因以冠名。」瓚曰：「許慎曰莫邪，大戟也。」**索隱**應劭曰：「莫邪，吳

大夫也，作寶劍，因名焉。」吳越春秋曰：「吳王使干將造劍二枚，一曰干將，二曰莫邪。」莫邪，干將，劍名也。

頓，鈍也。

〔八〕集解 徐廣曰：「思廉反。」綱案：漢書音義曰「鈺謂利」。

〔索隱〕鉛者，錫也。鈺，利也，音纖。言其暗惑也。

〔九〕集解 應劭曰：「嚶嚶，不自得意。」瓚曰：「生謂屈原也。」

〔一〇〕集解 如淳曰：「幹，轉也。」爾雅曰「康瓠謂之瓢」，大瓠也。應劭曰：「康，容也。幹音筦。筦，轉也。一曰康，空也。」

〔索隱〕幹，轉也，烏活反。爾雅云「康瓠謂之瓢」。瓢音丘列反。李巡云「康謂大瓠也」。康，空也。晉灼

云「幹，古「管」字也」。

〔一一〕正義 罷音皮。

〔一二〕索隱 戰國策曰：「夫驥服鹽車上太山中阪，遷延負轅不能上，伯樂下車哭之也。」

〔一三〕集解 應劭曰：「章甫，殷冠也。」

〔一四〕集解 劉向別錄曰：「因以自諷自恨也。」

〔一五〕集解 應劭曰：「嗟，咨嗟。苦，勞苦。言屈原遇此難也。」

訊曰：〔一〕已矣，國其莫我知，獨堙鬱兮〔二〕其誰語？鳳漂漂其高邁〔三〕兮，夫固自縮而遠去。〔四〕襲九淵之神龍兮，〔五〕泐〔六〕深潛以自珍。〔七〕彌融爚〔八〕以隱處兮，〔九〕夫豈從蠃與蛭蟻？〔一〇〕所貴聖人之神德兮，遠濁世而自藏。使騏驥可得係羈兮，豈云異夫犬羊！〔一一〕般紛紛其離此尤兮，〔一二〕亦夫子之辜也！〔一三〕瞻九州〔一四〕而相君兮，何必懷此都也？鳳皇翔于千仞之上兮，覽惠暉而下之；〔一五〕見細德之險〔一六〕〔一七〕兮，搖增

翻〔一〕逝而去之。〔二〕彼尋常之汙瀆兮，〔三〕豈能容吞舟之魚！橫江湖之鱸鱠兮，〔四〕固將制於蟻螻。〔五〕

〔一〕集解李奇曰：「訊，告也。」張晏曰：「訊，離騷下章亂辭也。」索隱諄曰。李奇曰：「諄，告也，音信。」張晏

曰：「訊，離騷下章諄亂也。」劉伯莊音素對反。訊猶宜也，重宜其意。周成、師古音碎也。

〔二〕索隱漢書作「壹鬱」，意亦通。

〔三〕索隱音逝也。

〔四〕索隱縮，漢書作「引」也。

〔五〕集解鄧展曰：「襲，重也。」或曰襲，覆也，猶言察也。索隱襲，復也。莊子曰「千金之珠必在九重之淵，而

驅龍領下」，故云「九淵之神龍」也。

〔六〕集解徐廣曰：「亡筆反。」

〔七〕集解徐廣曰：「沕，潛藏也。」索隱張晏曰：「沕，潛藏也。音密，又音勿也。」

〔八〕集解徐廣曰：「一云『佶蟻獺』。」

〔九〕集解徐廣曰：「一本云『彌蜴燿以隱處』也。」索隱漢書作「佶蟻獺」，徐廣又一本作「彌蜴燿以隱處」，蓋總三

本不同也。案：蘇林云「佶音面」。應劭云「佶，背也。蟻獺，水蟲，害魚者。以言背惡從善也」。郭璞注爾雅云

「似鳧，江東謂之魚鳩」。正義顧野王云：「彌，遠也。融，明也。燿，光也。」沒深藏以自珍，彌遠明光以隱處

也。

〔一〇〕集解漢書「螳」字作「蝦」。韋昭曰：「蝦，蝦蟇也。蛭，水蟲。蟻，丘蟻也。」索隱螳音蟻。漢書作「蝦」。言

倜然絕於螻蟻，況從蝦與蛭蟻也。蛭音質。蟻音引也。 [正義] 言寧投水合神龍，豈陸葬從蟻與蛭蚓。

〔二〕 [正義] 使騏驥可得係縛羈絆，則與犬羊無異。賈屈原不去濁世以藏隱。騏文如綦也。驥，千里馬。

〔三〕 [集解] 蘇林曰：「般音盤。」孟康曰：「般音班。」或曰盤桓不去，紛紛構讒意也。 [索隱] 般音班，又音盤，槃桓

也。紛紛猶藉藉，構讒之意也。尤謂怨咎也。

〔三〕 [索隱] 漢書「辜」作「故」。夫子謂屈原也。李奇曰：「亦夫子不如麟鳳翔逝之故，罹此咎也。」

〔四〕 [索隱] 臆，丑知反，謂歷觀也。漢書作「歷九州」。

〔五〕 [索隱] 案：言鳳皇翔，見人君有德乃下。故禮曰「德輝動乎內」是也。

〔六〕 [集解] 徐廣曰：「一云『遙增擊』也。」

〔七〕 [正義] 搖，動也。增加也。言見細德之人，又有險難微起，則合加動羽翮，遠逝而去之。

〔八〕 [集解] 應劭曰：「八尺曰尋，倍尋曰常。」 [索隱] 音烏獨二音。汙，潢汙；瀆，小渠也。

〔九〕 [集解] 如淳曰：「大魚也。」瓚曰：「鱣魚無鱗，口近腹下。」

〔三〇〕 [索隱] 莊子云庚桑楚謂弟子曰「吞舟之魚，蕩而失水，則螻蟻能制之」。戰國策齊人說靖郭君亦同。案：以此喻

小國暗主不容忠臣，而為讒賊小臣之所見害。

賈生為長沙王太傅〔一〕二年，有鴉飛入賈生舍，止于坐隅。楚人命鴉曰「服」。〔三〕賈生

既以適居長沙，長沙卑溼，自以為壽不得長，傷悼之，乃為賦以自廣。〔三〕其辭曰：

〔一〕 [索隱] 為長沙傅。案：誼為傅是吳芮之玄孫產襲長沙王之時也，非景帝之子長沙王發也。荆州記「長沙城西北

隅有賈誼宅及誼石牀在矣」。

〔正義] 漢文帝年表云吳芮之玄孫差襲長沙王也。傅為長沙靖王差之二年也。括

地志云：「吳芮故城在潭州長沙縣東南三百里。賈誼宅在縣南三十步。湘水記云：「誼宅中有一井，誼所穿，極小而深，上斂下大，其狀如壺。傍有一局脚石牀，容一人坐，形流古制，相承云誼所坐。」

〔三〕集解 晉灼曰：「異物志有山鷓，體有文色，土俗因形名之曰服。不能遠飛，行不出域。」索隱案：鄧展云「似鵠而大」。晉灼云「巴蜀異物志有鳥〔如〕小鷓，體有文色，土俗因形名之曰服。不能遠飛，行不出域」。荆州記云「巫縣有鳥如雌鷓，其名爲鷓，楚人謂之服」。吳錄云「服，黑色，鳴自呼」。

〔三〕索隱案：姚氏云「廣猶寬也」。

單闕之歲兮，〔二〕四月孟夏，庚子日施兮，服集予舍，〔三〕止于坐隅，貌甚閒暇。異物來集兮，私怪其故，發書占之兮，筮言其度。〔三〕曰「野鳥入處兮，主人將去」。請問于服兮：〔四〕「予去何之？吉乎告我，凶言其菑。〔五〕淹數之度兮，語予其期。〔六〕服乃歎息，舉首奮翼，口不能言，請對以意。〔七〕

〔一〕集解 徐廣曰：「歲在卯曰單闕。文帝六年歲在丁卯。」索隱爾雅云「歲在卯曰單闕」。李巡云「單闕，起也，

陽氣推萬物而起，故曰單闕」。孫炎本作「蟬焉」。蟬猶伸也。正義闕，鳥葛反。

〔二〕集解 徐廣曰：「施，一作『斜』。」索隱施音移。施猶西斜也。漢書作「斜」也。

〔三〕索隱 漢書作「讖」。案：說文云「讖，驗言也」。今此「筮」蓋雜筮辭云然。正義發策數之書，占其度驗。

〔四〕索隱 于，於也。漢書本有作「子服」者，小顏云「子，加美辭也」。

〔五〕正義 音災。

〔六〕**集解**徐廣曰：「數，速也。」

〔七〕**索隱**協音臆也。 **正義**協韻音憶。

萬物變化兮，固無休息。幹流而遷兮，〔二〕或推而還。形氣轉續兮，變化而嬗。〔三〕
 沕穆無窮兮，〔三〕胡可勝言！禍兮福所倚，〔四〕福兮禍所伏；〔五〕憂喜聚門兮，吉凶同
 域。〔六〕彼吳彊大兮，夫差以敗；越棲會稽兮，句踐霸世。斯游遂成兮，卒被五刑；〔七〕
 傅說胥靡兮，〔八〕乃相武丁。夫禍之與福兮，何異糾纏。〔九〕命不可說兮，孰知其極？水
 激則旱兮，矢激則遠。〔二〇〕萬物回薄兮，振蕩相轉。雲蒸雨降兮，錯繆相紛。大專槃物
 兮，〔二一〕塊軋無垠。〔二二〕天不可與慮兮，〔二三〕道不可與謀。遲數有命兮，惡識其時？

〔一〕**索隱**幹音烏活反。幹，轉也。

〔二〕**集解**服虔曰：「嬗音如蟬，謂變蛻也。」或曰蟬蔓相連也。 **索隱**章昭云：「而，如也。如蟬之蛻化也。」蘇林

云：「嬗音蟬，謂其相傳與也。」

〔三〕**索隱**漢書「無窮」作「無閔」。沕音密，又音昧。沕穆，深微之貌。以言其理深微，不可盡言也。 **正義**沕音

勿。

〔四〕**正義**於犧反，依也。

〔五〕**索隱**此老子之言。然「禍」字古作「𪔐」。案：倚者，立身也。伏，下身也。以言禍福遞來，猶如倚伏也。

〔六〕**正義**言禍福相因，吉凶不定。

〔七〕**集解** 章昭曰：「斯，李斯也。」

〔八〕**集解** 徐廣曰：「腐刑也。」**索隱** 徐廣云：「胥靡，腐刑也。」**晉灼**云：「胥，相也。靡，隨也。古者相隨坐輕刑之

名。」**墨子**云「傅說衣褐帶索，傭築於傅巖」。傅巖在河東太陽縣。又**夏靖書**云「猗氏六十里黃河西岸吳阪下，便得隱穴，是說所潛身處也」。

〔九〕**集解** 應劭曰：「福禍相為表裏，如糾纏繩索相附會也。」**瓚**曰：「糾，絞也。纏，索也。」**索隱** 章昭云：「纏，微

也。」又通俗文云：「合繩曰糾。」**字林**云：「纏三合繩也，音墨。」糾音九。

〔一〇〕**索隱** 此乃淮南子及鷓冠子文也。彼作「水激則悍」。而**呂氏春秋**作「疾」，以言水激疾則去疾，不能浸潤；矢激

疾則去遠也。**說文**「旱」與「悍」同音，以言水矢流飛，本以無礙為通利，今遇物觸之，則激怒，更勁疾而遠悍，猶人或因禍致福，倚伏無常也。

〔一一〕**集解** 漢書「專」字作「鈞」。如淳曰：「陶者作器於鈞上，此以造化為大鈞。」**索隱** 漢書云「大鈞播物」，此「專」

讀曰「鈞」。槃猶轉也，與播義同。如淳云：「陶者作器於鈞上，以造化為大鈞也。」**虞喜志林**云：「大鈞造化之神，鈞陶萬物，品授羣形者也。」**案**：上鄒陽傳注云「陶家名模下圓轉者為鈞，言其能制器大小，以比之於天」。

〔一二〕**集解** 應劭曰：「其氣塊軋，非有限齊也。」**索隱** 塊圪無垠。應劭云：「其氣塊圪，非

有限齊也。」**案**：無垠謂無有際畔也。**說文**云「垠，圻也」。郭璞注方言云「塊圪者，不測也」。王逸注楚詞云「塊圪，雲霧氣味也」。**正義** 塊，烏郎反。軋，於點反。

〔一三〕**索隱** 與音預也。

且夫天地為鑪兮，造化為工；〔一〕陰陽為炭兮，萬物為銅。〔二〕合散消息兮，安有

常則；〔三〕千變萬化兮，未始有極。〔四〕忽然爲人兮，何足控搏；〔五〕化爲異物兮，〔六〕又何足患！〔七〕小知自私兮，賤彼貴我；〔八〕通人大觀兮，物無不可。〔九〕貪夫徇財兮，烈士徇名；〔一〇〕夸者死權兮，〔一一〕品庶馮生。〔一二〕怵迫之徒兮，或趨西東；〔一三〕大人不曲兮，〔一四〕億變齊同。拘士繫俗兮，攔如囚拘；〔一五〕至人遺物兮，獨與道俱。〔一六〕衆人或或兮，好惡積意；〔一七〕真人淡漠兮，獨與道息。〔一八〕釋知遺形兮，超然自喪；〔一九〕寥廓忽荒兮，與道翱翔。乘流則逝兮，得坻則止；〔二〇〕縱軀委命兮，不私與己。其生若浮兮，其死若休；〔二一〕澹乎若深淵之靜，汜乎若不繫之舟。〔二二〕不以生故自寶兮，〔二三〕養空而浮；〔二四〕德人無累兮，〔二五〕知命不憂。細故憊薊兮，何足以疑！〔二六〕

〔一〕索隱 此莊子文。

〔二〕索隱 既以陶冶喻造化，故以陰陽爲炭，萬物爲銅也。

〔三〕索隱 莊子云：「人之生也，氣之聚也，聚則爲生，散則爲死。」

〔四〕索隱 莊子云：「人之形千變萬化，未始有極。」

〔五〕集解 如淳曰：「控，引也。控搏，玩弄愛生之意也。」 索隱 按：控，引也。搏音徒端反。控搏謂引持而自玩

弄，貴生之意也。又本作「控揣」。揣音初委反，又音丁果反。揣者，量也。故晉灼云「或然爲人，言此生甚輕耳，何足引物量度己年命之長短而愛惜乎」！

〔六〕索隱 謂死而形化爲鬼，是爲異物也。

〔七〕**索隱** 協音環。

〔八〕**索隱** 莊子云「以物觀之，自貴而相賤」是也。

〔九〕**索隱** 莊子云「物固有所然，物固有所可，無物不然，無物不可」也。

〔一〇〕**集解** 應劭曰：「徇，營也。」**瓚**曰：「以身從物曰徇。」**索隱** 此語亦出莊子。臣瓚云「亡身從物謂之殉」也。

〔一一〕**集解** 應劭曰：「夸，毗也。好營死於權利。」**瓚**曰：「夸，泰也。」莊子曰「權勢不尤，則夸者不悲」也。**索隱** 言

好夸毗者死於權利，是言貪權勢以自矜夸者，至死不休也。按：**韃**為舍人注爾雅云「夸毗，卑身屈己也」。曹大家云「體柔人之夸毗也」。尤，甚也。言勢不甚用，則夸毗者可悲也。

〔一二〕**集解** 孟康曰：「馮，貪也。」**索隱** 漢書作「每生」，音謀在反。孟康云「每者，貪也」。服虔云「每，念生也」。鄒

誕本亦作「每」，言唯念生而已。今此作「馮」，馮亦持念之意也。然案方言「每」字合從手旁，每音莫改反也。

正義 馮音憑。

〔一三〕**集解** 孟康曰：「怵，為利所誘怵也。迫，迫貧賤，東西趨利也。」**索隱** 漢書亦有作「私東」。應劭云：「仕諸侯為

私。時天子居長安，諸王悉在關東，羣小怵然，內迫私家，樂仕諸侯，故云「怵迫私東」也。」李奇曰：「私」多作「西」者，言東西趨利也。」怵音黜。又言怵者，誘也。

〔一四〕**索隱** 張機云：「德無不包，靈府弘曠，故名『大人』也。」

〔一五〕**集解** 徐廣曰：「擗音華板反，又音腕。」**索隱** 擗音和板反。說文云「擗，大木柵也」。漢書作「篳」，音去隕反。

〔一六〕**索隱** 莊子云：「古之至人先存諸己，後存諸人。」張機云：「體盡於聖，德美之極，謂之至人。」

〔七〕**集解**李奇曰：「或或，東西也。所好所惡，積之萬億也。」**瓚**曰：「言衆懷抱好惡，積之心意。」**正義**按：意，合韻音憶。

〔八〕**索隱**莊子云：「古之真人，不知悅生，不知惡死，不以心捐道，不以人助天。」**呂氏春秋**曰：「精氣日新，邪氣盡去，反其天年，謂之真人也。」

〔九〕**集解**服虔曰：「絕聖弃知而忘其身也。」**索隱**按：釋智謂絕聖弃智也。遺形者，「形故可使如槁木」是也。自喪者，謂「心若死灰」也。**莊周**云「今者吾喪我，汝知之乎」？

〔十〕**集解**徐廣曰：「坻，一作『坎』。」**駟案**：張晏曰「坻，水中小洲也。」**索隱**漢書「坻」作「坎」。按：周易坎「九二，有險」，言君子見險則止。

〔十一〕**索隱**莊子云「勞我以生，休我以死」也。

〔十二〕**索隱**出莊子也。

〔十三〕**索隱**鄧展云：「自寶，自貴也。」

〔十四〕**集解**漢書音義曰：「如舟之空也。」**索隱**言體道之人，但養空性而心若浮舟也。

〔十五〕**索隱**按：德人謂上德之人，心中無物累，是得道之士也。

〔十六〕**集解**章昭曰：「懣音士介反。」**索隱**蕝音介。漢書作「介」。張揖云：「遼介，鯁刺也。以言細微事故不足遼介我心，故云『何足以疑』也。」**正義**懣，忍邁反。蕝，加邁反。

後歲餘，賈生徵見。孝文帝方受釐，〔一〕坐宣室。〔二〕上因感鬼神事，而問鬼神之本。賈

生因具道所以然之狀。至夜半，文帝前席。既罷，曰：「吾久不見賈生，自以爲過之，今不及也。」居頃之，拜賈生爲梁懷王太傅。〔三〕梁懷王，文帝之少子，愛而好書，故令賈生傳之。

〔二〕集解 徐廣曰：「祭祀福胙也。」駟案：如淳曰「漢唯祭天地五時，皇帝不自行，祠還致福」。釐音儻。

〔三〕集解 蘇林曰：「未央前正室。」索隱 三輔故事云：「宣室在未央殿北。」應劭云：「釐，祭餘肉也。音儻。」

〔三〕索隱 梁懷王名緝，文帝子。

文帝復封淮南厲王子四人皆爲列侯。賈生諫，以爲患之興自此起矣。賈生數上疏，言諸侯或連數郡，非古之制，可稍削之。文帝不聽。

居數年，懷王騎，墮馬而死，〔二〕無後。賈生自傷爲傅無狀，哭泣歲餘，亦死。賈生之死，時年三十三矣。及孝文崩，孝武皇帝立，舉賈生之孫二人至郡守，而賈嘉最好學，世其家，與余通書。至孝昭時，列爲九卿。

〔二〕集解 徐廣曰：「文帝十一年。」

太史公曰：余讀離騷、天問、招魂、哀郢，悲其志。適長沙，觀屈原所自沈淵，〔二〕未嘗不垂涕，想見其爲人。及見賈生弔之，又怪屈原以彼其材，游諸侯，何國不容，而自令若是。讀服鳥賦，同死生，輕去就，又爽〔三〕然自失矣。

〔二〕**索隱**按：荆州記云「長沙羅縣，北帶汨水。去縣四十里是原自沈處，北岸有廟也」。

〔三〕**集解**徐廣曰：「一本作『爽』。」

【索隱述贊】屈平行正，以事懷王。瑾瑜比潔，日月爭光。忠而見放，讒者益章。賦騷見志，懷沙自傷。百年之後，空悲弔湘。